

荃
蒼
余
齋
駢

體
文
存
已
未
孟

夏
樊
山
樊
增
祥
題

重校凡
悉可替

序

曩寓姑餘樂親才士所至莫逆者則爲武進沈越若同年方標獨秀互競儷辭比入京師與屠結一汪袞父相善結一專精元史不復屬文袞父旣治國聞未蠲夙好曾相約曰願與子終老於漢魏家言僕躓其語病未能也人海藏身華年彈指重商舊學厥有時英初識成都鄧君守瑕目爲杜樊川陳同甫一流過從寢數出示是編點定謬期低徊歎服君著述至富刪削務嚴所存諸作大都旨歸典則辭尙體裁導源於元嘉永明合轍於咸亨調露方諸往代實四傑之嗣音擬以近人亦二胡

之勁敵沈博絕麗疇抗顏行君秉負異資淹貫羣籍衍
禹彪之緒國志姚聲生卿雲之鄉天庭挾藻光分輿井
精勰岷峨固宜炤爛篇章發皇耳目當茲藝文垂盡酷
甚羸燔儒墨交攻咎歸頡頏製君迺語韓陵之片石發謝
傅之碎金握璧懷珠練青濯絳何異陳章裸國奏雅桑
間梁簡文謂文之橫流一至於此又曰文章未墜必有
英絕領袖之者斯言而信微君誰歸惟念相輕自古子
桓所嗤知音難逢東莞所戚僕固自悔少作筆硯久焚
君亦私懺瓊思金石獨止證果識菩提之義不在優曇
傳鐙悟香火之緣非關須曼三千世界生聖解於桃花

八百修羅終敗歸於藕孔
蘄窮智度誓守麤提蓋自倉
葛民呼昏餘範演城臺俄圮
桓幕載傾杜陵動奕棋之
嗟沈約作郊居之賦而君與
僕之把臂入林者殆從此
始焉訪西涯之一角餘話詩
龕涉江亭之十尋聯吟瓶
社作圭年生日象謁慈仁譯
罽賓造論瀾翻烏水凡茲
涉覽都雜悲愉錄東京之夢
華添宣南之掌故所願中原
無事南宇再康滄海不波息
龍蛇之起陸草堂戢景免猿
鶴之笑人君馳喻蜀之書我
續僑吳之集闔門匹練望遠
他時巫峽清秋相思故國昔
稚存之贈言船山曰一日之內
僕眺日升君眺日沒一江之水
君飲其源

我飲其委雅游可眷非想無殊用造勝因以爲息壤已
未六月汾陽王式通

荃察余齋駢體文存

成都鄧 鎔守瑕

鐙賦并敘

廓落無朋塊獨尠
一鐙照愁感而爲賦
昔文通瓌意託體于
淮安蘭成麗思寓言
于蘇季誼各有指弗
相沿襲譬夫曠容自
媚不必效于先顰蹇
步亦適甯用希于穆
駕體物寫志庶詒哲
工鑒焉

修漏兮沈深曼夜兮幽悄
颺珠綴兮冪屢揜瑤房兮竄
窰重以曜晦素魄陰隲元穹
雨蕭淅而溜櫺風刁調而
撼窗酌清醕兮誰共吹參差
兮靡同掩孤光而鄉壁照

隻影而弗雙則有長門妖媛上宮姪娥窈窕工顰清矚
回波斷君恩今履綦跡紆妾恨今紈扇歌愁如煎而轉
促光返照以無多至乃關河絕耗閨闈盼遠積思愈瘳
孤坐易晚蘭竭膏而更斟華垂綏而遲翦紉軋軋之繁
緒睇金釭而不轉更或碧玉盛年蘭芝嫁夕袂裙始繡
絲履罷織鈿釵剔而微明熨斗吹而防威冀佳期兮夕
張託告音於鷓鴣莫不要眇憐景輓斷迴腸繁會坐捐
悽宵嚮長託微波以貢忱盼寥天之啓明幸分君之餘
耀鑒我心之煨煨矧夫崔駟不樂之年文園消渴之病
有揚雲之逐貧無孝標之辨命湛思則覆瓿自甘離憂

則呵壁誰問心拔死於卷施齒加長於屈乘爾迺幽鏜
窈冥回回熒熒燼殘抗蕤蜜然扇馨蛾乍拂而燦赤螢
未流而宕青空衾之寒瀕襲長簟之夢夙醒心鹿鹿而
累轉目鰥鰥而詎瞑羌轉側而輟寢彌愾息而弗甯彼
其九華覆殿百子芳池列錢銜璧金支翠蕤韜映繁曜
標搖涼颺盤燭未炮除燎競輝謳清商而舞激風御陽
文而擁先施曷嘗不娛靈悅魄申旦弗疲然則感觸肇
乎無端忻戚繇乎所託鬱壹則陽林失絢豫暢則秋皋
貢縟初明善恨詎通天之表哀孟嘗將涕匪雍門之柱
促聊段意於篇翰抒予懷之悵愴

感秋賦并敘

蓋聞灑露始賈胎禽警於悽宵繁霜坐零豐鐘騰其厲
響應候赴感物我并涂欲塞芳杜託微波以通辭獨處
幽篁哀高丘之無女此則沈休文之六憶藉以明忱張
平子之四愁於焉緘恨者也夫婉孌求皇之柱綢繆射
雉之皋繫繫欽之香囊贈徐淑之明鏡謂余兮善窈窕
橫大江而揚靈思君兮吹參差紉秋蘭以爲佩我獨何
人爲爾寂寂嗟虛淑景告謝恐嫦娥之笑人余情信芳
眷匏瓜之無匹聖蠲繁會竊悲懍秋聊裁斯篇代摠積
悵朋好知我覽而鑒焉其謂孟檠之本事玉谿之無題

乎賦曰

若夫晴昊砒礪橫焮慄慄薄寒中人徂火斂熱肅清商
以激吹道蓐收而按節始生洞庭之波乍墮亭皋之葉
班婕妤之紈扇棄捐庾開府之江關蕭瑟喟涼燠之如
代儵蒼然而秋色秋色何如春色好悲秋宋玉驚秋早
幾曾秋月照人圓但覺秋風送人老秋風秋月引秋心
一斛明珠一寸陰壁瑠帳裏秋先度雲母窗前秋易沈
修眉連娟紅粉淚潁容蕉萃白頭吟却珧軫而弗御沐
蘭湯而罷斟琥珀鏤金枕蒲桃織錦衾嘉會良獨難離
憂不可任爾其朝餐英落夕擘宿莽玄圃驂虬闥風縠

馬襟佚女於城臺娉雲君於湘渚思公子兮未言悲回
風兮中阻芳菲菲兮滿堂夔申申兮詈予奄忽成遲算
序候迭更除塊處夜不暘痠思心轉孤肅肅流颺卷珠
幔團團浥露溼金塗涼侵漢殿芝房冷客散梁園桂阪
蕪印看紅蕊萎庭蕙頰眊藹條墮井梧衰哀惋惜春華
變故人指爪新人面登山臨水送將歸黃姑織女不相
見相見盈盈二十時神光離合瑩瓌姿王母從來使青
鳥陸郎曾此繫斑騅鬢髮高縈髻頰顏薄點脂回矚貢
清睇對影剗平眉百寶同心結雙花連理枝已信無反
覆焉知有別離登牆窺宋傾城渺錯烏留髡曲宴遲嬾

嬾兮平浦空波寥寥兮遙天無際銅荷炮兮夜未闌綺
櫳寂兮晝猶閉啜菽有不瞑之時佩蓉少蠲勞之意旅
鳥黠鷄尙戀巢熠燿熒回偏遶砌遶砌却復前算唱想
夫憐鴛鴦機上秦川錦蟋蟀鐙中蜀國絃斜漢苕遙隔
清淺纖娥修阻望嬋娟嬋娟空太息夫君思悱惻錦瑟
長來已似人履綦沒處今無跡犯斗何年更問津望夫
未信能成石况玄露之霑霽更淫潦之漂溢注修漏於
銅壺滋鉛淚於金狄虛櫺則蕭淅彌淒重櫺則涓涔不
絕誰不流騷怨以煩惋拾墜驪而結轡是知世何年而
不秋秋何人而不愁東南孔雀飛西北浮雲流擷蕪芳

於楚畹雪橫涕於荆樓過市招搖大垂手渡河淒咽鈿
筓篋寸心緯畫無靈璫長佩陸離問蹇修九天可正重
闈遠蹀躞年年溝水頭

丞相祠堂碑

夫朱明韜曜六幽之修夜何暘紫泉闕清四溟之橫瀾
焉極矧迺難炎靈之隕燼虞賓促告檀之符興寓縣之
霸功當塗有漸高之讖歸吳玉璽光燦燭井之芒辭漢
銅仙淚瀉如鉛之水策的盧而咤叱幾湮種菜之傭非
潛蚪之連蜷孰翊樓桑之帝此則人思其德九原可作
之臣民報惟功百世不祧之祀者也成都府城西南二

里有漢丞相諸葛忠武侯祠堂在焉密邇惠陵鬱葱佳
氣茂陵磨劍詎憤心于武皇灤水嚙和尚張朝于王季
丞相子瞻瞻子尚并从配食壯丹青之色兩世兒孫滲
玄黃之血一門忠孝斯固公慚卿而卿慚長光于太丘
之碑雌者霸而雄者王弼乎陳寶之瑞者矣丞相遭際
時艱天訖漢命方州鼎剝俊桀颯舉僞朝臣子旣那腹
而華頭清門季梟亦吳虎而魏狗惟丞相轟聲紫色斥
閨運之非驥尾青雲附宗英而顯高驥鱗翮贊蕭張之
前籌作朕翼肱續高光之墜紐麟筦轆樂駢摯跗望隆
贊霸王之略苞孕天人之槩恢恢乎非一端所能罄者

焉揆厥初志靡求聞達拜德公於臥榻折腰未妨貯醜
女於重閨畫眉爲笑自建安十二年昭烈皇帝見丞相
於隆中輟棘津之屠刀釋嫫原之鼎鉉遂紓神策宰割
天下迺使昭烈皇帝載祇車而出斜谷見漢官司隸之
威儀祭石鏡而封武擔發掖庭曾孫之王氣卽至藐孤
六尺疆索三分猶且渡瀘水以南征趣祁山而北伐嗟
乎大星儵殞帝醉可知零雨其濛公歸何日傳曰苟利
社稷死生以之又曰竭股肱之力加之以忠貞方於前
志若合符節美矣又善無得而稱雖復遺集編訂陳壽
彙爲一書異辭傳聞郭沖條其五事而縉紳之士言惟

雅馴金石之文辭尙體要故弗贅焉獨念古昔勞臣哀
榮異禮沙石礲确封叔敖寢丘之田祕器温明蠹去病
祁連之冢而丞相綸巾羽扇一生不改布衣羽葆金鈇
十錫尙虛冊命生則移家帶郭宅桑留手澤之詒死則
因山爲墳宰樹肅神飆之氣當日者愛召伯之舍路祭
尙有遺黎鑄范蠡之金朝議不登祀典嗣因習隆之請
始立沔陽之祠未嘗不歎後主之所以惓悼勳勞推恩
故舊未爲厚也而今則相柳北射畏共工之臺齊師東
來護展禽之壟血毛尙臭薺達三泉蕭艾升馨光彌四
宙此蓋靈爽式憑所爲歆響者與天威如在千年蜀虎

之魂遺愛弗諉百拜巴鵲之淚門外之馬牛轉運猶羞
巾幗之遺階前之猿鳥無聲似肅籙書之敬高吟梁父
卽代神絃宿構書臺仍分漢壤佇想指揮之定銅鼓如
鳴褻衷禮樂之興金絲暗奏固知天容倚杵海或揚塵
而靈構巋然饗堂弗圯一體君臣祭祀同先主之闕宮
萬古雲霄羽毛肅宗臣之遺像

杜主廟碑

夫參觜流爲益州是曰險隘江源濫於豳阜始猶涓涔
至於犂魃扼其吭淫預筦其轄水嬰戰龍之怒陸愆其
魚之厄非夫操柁自穀深懿檣巢之危乘軛任劬曷戢

襄陵之軌是以浦犀轉鬪陟灌堰而賽冰壁龍怒翔眷
龔山而祀禹元珠旣竊江瀆奇相之靈瑤光是降雲雨
巫娥之夢凡以神威翕絕水德靈長泝功烈之滂澹繫
謳思於絲邈矧夫載祇車於斜谷功參叢灌之先刻玉
瑄於延禧道契勳華之禮雙流漑蜀童山盡墾膏腴八
世治鄆江水舊成湯沐而顧使巴人蒞訟獨神孟涂之
衣寶童薦馨惟酌女趨之石衣冠原廟非魂魄所樂遊
劍舄喬山曾樵蘇之弗禁非所以昭祀典妥明祇也然
則如杜主者宜有述焉謹案主名杜宇號曰望帝皇妻
娥媵娉天妹于朱提帝葉皇支嗣舊服于若水姬籙云

季蜀傲奄荒意必有浮龜之文斷鼇之武胎宓孕頊藻
軒績炮迺能笮馬旄牛候兔雲而鏟利黎風雅兩枋狼
弧以抗稜特厯紀數千書契荒落故靡得而頌焉然而
玄囂誕命曜華渚之流虹黃軒降靈繞壽邱之祕電娥
簡履胎于玄胤慶都交夢於赤龍莫非千祥彪瑞聖之
符五德配感生之帝而主則奇表夙異運斗戴夫鉤鈐
天精自隳行稌謝夫弓韞文題垂髻荒忽剖竹之王日
角珠衡放佛空桑之相此其出符也若夫牛哀成虎楚
媼爲媛秦女化石支離變柳脫蚩尤之桎遂長丹楓裂
蓑叔之鉞迺藏碧玉猶曰虞初之小說黍叟之寓言至

如九尾狐龐傳侯人於開母三足能舞夢爲躩于窳侯
惟主精靈方斯變幻至今鶴周遺響裂山竹以悽宵布
穀促耕嘆春田而警惰則其靈化也且夫一曲一直高
驥怒馬之濤三暮三朝實墮聽蟻之淚雖復琅函瑤簡
奉龍威丈人之書童律狂章拜雲華夫人之笈而正恐
堯肌如腊禹脰無毛虛勞湛王之蘄莫必錫圭之瑞主
則授令荆尸遠疏夔硤黃麾奉律覲天使於巫陽白練
滎江鬪祆神於沫水卒使馮夷罷浪陽侯不驕亦如呂
梁百步之洪犇懸急溜華嶽雙峯之掌側讓河流此其
熙業也粵若腐遷作史八書示戒於河渠神禹濬川四

載盡力於溝洫凡夫斥鹵悉資灌溉是以叔敖循吏決
思期以灌雩婁臺駘世官宣汾洸以鄆大澤而主則演
之以灑沫浸之以絲維綺媵徧沃烏壤成甘煖煦千肌
春澣撞華之布甘流萬舌秋韞魁芋之田遂致錦市銅
陵地稱陸海瓜疇蔗圃人盡封君則其詒惠也自夫軒
孫佶子侯伯皆五帝之支陽魏陰燕封建非三王之意
是以姬公赤舄終歸曲阜之藩伯翳阜旂仍有嵩陽之
遜矧主謳歌擁戴人神啓暋天下所歸往者王以有功
而愛命聖人之大寶曰位詎傳子而德衰何必高抗巢
由遠楫臧札主則始焉納麓以考庸終焉葺臺而告禮

輸我神器翻同楚履之遺允作虞賓不俟垚城之變斯
則繁露十二脫纏鏢于園門支川三千蛻塵埃於泓渚
者已今者烏號已墮鴻冢猶封鄆縣之南主墓斯在神
明所舍微獨雍州之積高陟降在天猶戀茅山之會計
雖復鑿驪山之隧道牧火宵明衝灤水之回波棺和盡
齧然而風車電轡石筍之雙莖燎火封雲掩玉衡於
五亥墓側有廟開明祔焉川原共哀兩朝揖讓之容竄
窳嬾媚一體君臣之祭剏始於齊建武之代樂石其鏗
重修於宋康定之年祕宮有恤明季兵荒遂遭燔燬穀
林窆石人傳唐帝之封茅屋陪陵誰祀昭王之德我國

家扇懿王表翔威鬼區隳五岳以升中飭百靈而會帝
神州赤縣狼環蓋地之圖鬱鬯黃纍麀皮郊天之鼓於
道光十五年俯允閭邑紳耆之請躋於歷代帝王之列
爰勅守土春秋致饗禮也惟主據三川之沃饒未通上
國當七雄之兼并終爲讓王服畏光於生前樂利詒之
沒世故能繇茲絕代歆彼明禋廟碣無文曷式來葉於
虛悠悠古史精衛應招填海之魂屹屹穹碑炮媧借與
補天之石譏蜀王之紀散佚無書過通天之臺淒涼抗
表將使千年怨魄啼嶂台白水之墟一殿靈光抗僊館
青城之洞豈止九元真母鉅靈西嶽之河神六甲靈飛

揚雲北方之鬼帝也哉

禮殿頌

成都府學禮殿在焉車服禮器如升孔堂敬器金人環
觀稷廟彈琴在莒孟軻斯爲聖徒濫竽於齊孫卿是謂
祭酒翮翮其敬郁郁乎文堂哉皇哉美矣備矣殿始於
東漢初平間叛者高君朕朕陳留人也粵稽其時皇綱
失馭俊桀颯舉方州鼎裂劍璽不戒炎靈忽而遂遺當
塗讖高虞賓促於告禋干櫓騁驚絃誦衰歇橫舍失葺
牧豎刈其園蔬黍書漸譌朋徒更其經字高君於是慨
雅道之不競愍舊學之遽輟乃於石室東徧增置斯殿

將將鐘筦莘莘俎豆道德之富上儀隆於辟雍饗射具
備王道見於矍圃以時習禮董率諸生以學愈愚淬厲
末俗承流不輟懿虔盛矣蓋蜀於上世未通中國絃誦
之聲旣闐侏儻之俗且悍嗣而叢望拓宇六籍靡遑羸
錙置郡四術不立洎文翁作牧張叔受經教授廣於巴
賈文雅媿於齊魯則有凡將訓纂蒐小學之遺文箕子
芟滋闡先師之故訓中和樂職王褒是宣冲穆道機莊
遵可頌高能鱗次聞人輻湊光於前志靡煩臚陳逮於
季漢稍稍缺矣高君振之未墜於地徽猷之所灑漬芳
潤之所漸沐浸淫千祀翹材踵武皇清聖聖相承文化

枕被圓冠方領委佗於大學期門羽林開悟於章句猶
且樹石經於橋門備法物於璧水尊養更老論難同異
縉紳冠帶醴育薰沐蜀學之盛蔚然興起道咸以后寢
衰寢弛弟子執經靡聞問難博士倚席倦於講說迺有
故制府盱眙吳勤惠公今湖廣總督前督學南皮張公
始於禮殿之偏建尊經書院鴻生摳衣巨儒鼓篋其揖
讓也旻旻而穆穆其聞見也元元而本本重以湘潭教
授大雅主持沿漢法以治經獵騷豔而蕩藻故能馳騁
文囿進爲三館之秀津逮來喆退爲一黌之雋比年廢
墜異乎所聞憬望前修衰衷故殿敬爲斯頌敢告同人

將使高山之仰勿迷于景行鄉校之議無惡于執政則
夢中丹黍容或許其追陪壁上金絲長不絕于聲響遂
爲之頌曰懿鑠高君令望令聞愛人以德博我以文化
被邛棘士希淵雲美石斯錯苾香其芬緬維三蜀亦彬
亦雅瓜疇芋區旄牛笮馬玉就砥礪金范挺冶廬江邈
焉后無繼者君曰俞哉倡率匪伊賓蜡大道繇蕞朝儀
國冑穆穆元士祁祁矧茲大郡孰克嗣之有密其堂有
伉其廡營室揆階玉衡奠礎應龍抗梁靈鼉樹鼓化翔
百城禮盛三古匪賢則聖列象應圖厥容維晬厥行式
模朱紫匪溷丹青弗渝炳焉三代光我上都黃髮耆儒

青衿學子負耒橫經攝齊觀禮學媿四門教流千祀遺
馥方馨靈扃弗圯皇家御極萬鱗仰流五經博士四姓
小侯於澤校射在頻馘囚潤色鴻業粉瓌元猷蜀僻于
遠不殖將落抒頌靡華治經則鑿陋矣鰕生夔哉先覺
挹注流風庶幾自勛錦濯逾絜鑿磨斯瑩不學胡獲惟
教迺成虞庠式廓漢京旣宏蔚爲國寶翊我聖清

閏三月三日再集浣花溪修禊序

光緒二十四年歲在著雍閏維窮月芳草未歇赤石之
夏初羣鷺亂飛秦淮之秦莫桐細始乳楊厄更穉爰集
花潭再修禊事颺風煦其媵我霽旭暘而媚人扳喬柯

以息陰藉新萸而連坐列岫展負輳齟齬之停雲澄泓
鑿開納涓涓之朏霸陬隅撥刺時見躍鱗粟留嚶鳴載
調好舌勝友畢集高談競張神馬尻輪理宗師之懸解
須鉤毛卵析要眇之辯端或賦大言皋陶嘻而厲響間
作危語盲人眯以臨深于是薦清醑旅肴蒸抗幼妙之
繁聲激鬪鬪之奇舞流音軫斷梁塵欲飛致態姁媮回
波動眇陀顏漸醉迺引輕旒徑長薄以擊蘅汎旋淵而
破藻旂神壙冑芒芴無端澡慮滄浪姪惕未極曜靈不
覺其已匿華鬢焉知其易髡然則煩惋伊鬱之意亦何
繇而作乎旣而驩情鄉闌哀思轉痗黍室嘯魯甯蹇睭

于淑速緯嫠恤周獨方皇于宗國闔廬入郢五戰甯期
伊川爲戎百年豈待車右雖恥于鳴君顏回實窘于醫
國此則蘭成作賦不無江關搖落之思伯仁渡江遂有
河山頓易之感者已至若流杯雒湄秉簡鄭洧飾漢艸
之魁服跼趙倡之利屣湔裙娜嬾記荆楚之歲時過市
招搖盛華陽之士女綦巾旣飾薜苕虞人煒管相詒峙
嶠結愛方將淫豫迭湯其樂只且我有殷憂知者蓋尠
夫勁焱瀟其振壑則孤鱗失其潛游野火蔓以燎燄則
逸翮并于焦爛若他日遼海棲泊藜牀坐穿鄂杜流離
文書散盡而猶欲如今之禕宅纓綉嘯歌琴酒其可得

乎嘆乎人間何世洵洵之流彌橫吾生有涯晻晻之暉
易弛時不我與趙臺卿之命奈何憂能傷人盛孝章之
年不永弗揆無文紀茲良會鄴臺公讌非無極驩之思
沂水春雩竊附詠歸之作

金堂縣附貢生饒府君墓誌銘

府君諱熙堂字雲橋華陽縣東鄉仁和場人先籍江西
臨江府清江縣祖箴可沂江販藥因家焉饘粥于是莫
或侮予歌哭在斯因而聚族父觀海衣食才足馬少游
之善人門閭自高于廷尉之陰德餘慶旁溥篤鍾府君
奉學澣淪孝謹繇其家法摳衣鼓篋禮讓逾于恆童年

二十六補金堂縣附學生員渥洼之產冀騁于康逵干
鏌之鋒屢躍于大冶頻試不第士論惋惜府君亦以太
翁春秋高遂絕意仕進董治生產爲家之督裁孟鑿斗
有約僮之文竹屑木頭惡棄地之貨數棋而后裕若素
封及太翁卒哀毀如禮聞延陵之葬四方來觀樹原氏
之阡千車畢會解屨滿堂方軌盈街應門行酒整案滌
榻繁難綦臻處決允當曲逆宰社父老歎其平均項梁
主喪子弟繇其部勒臨幾榦略萌柢于茲維時咸同之
交蜀寇蝟起探丸斫吏斬木爲兵篝火之鳴夜驚繡衣
之使四出鄰境騷結團自衛孰董孰帥僉推府君于

是擊柝剗宵揚鉦警衆農氓負梃鎰婦傳餐堵禦屹然
恃以無恐事平議敘大府將第其功狀而府君掩曜戢
華憇嬰世網拂衣而去對珪不分鬻鬻乎有蟹遜之遐
思遺榮之高致者焉跼伏里閭刊削標稜取信于展禽
比重岑鼎醉心于公瑾似飲醇醪凡有請質咸予理遣
排解紛糾各如其意牛無敢盜斯同王烈之鄉馬不能
前迺近公超之市吾聞其語今見斯人若夫帛緜煦凍
寒覆輝肌貸量周飢枯回儉腹族姓分其餘潤媼黨丐
其殘膏慷慨施予蓋天性云晚而務閒彌思曠適婚嫁
始畢向子平之遊嶽未期哀樂傷人謝安石之聞箏易

感吹騶子之律而幽都不春揮魯陽之戈而凋景詎駐
遂于光緒戊子年正月六日以疾卒距生于嘉慶癸酉
年春秋七十有六始葬簡州之黃土場葬十年歲丁酉
遷葬金堂縣之金斗堰子四先春如春俱國子監生先
春早歿吉春邑廩生書春以入貲得翰林院孔目職銜
女五其一適鄧卽鎔母也鎔以少孤惇子靡怙府君異
疎錄而恤之葛相詒書重下流之戒甯氏相宅有貴甥
之符鎔不肖弗早達年十九補成都縣附學生員而府
君卒蓋三載矣搗州門之策空淚羊曇坐絲竹之筵苦
思臧質且無論匡衡射策未擢甲科孫卿著書老爲祭

酒卽有時龍鱗鳳翼富貴逼人燕領虎頭王侯無種而
生芻祭墓如玉何人淺瀨回波投金無處蒼茫獨立吾
誰與歸乎於虜消搖杖履想見生存零落山丘定成永
恨用章徽懿敢託沈銘子幼能文太史公遂不及見中
郎所作郭有道曾無媿辭庶幾千歲來歸識令威化鶴
之表徒歎九京不作拜廣川下馬之陵爲之銘曰方諸
剖胎靈蔡剗腸翠弋于羽膏煎以明允矣君子止止吉
祥道徽高扇天穀內張始呱克疑旣冠彌奮聲騰一鬢
光照十乘屢策賢良卒嗟時命康瓠見寶魯璠轉擯珮
蘭不芳維桑式恭太丘道廣伯始中庸若谷其虛蹈桀

弗縱垂范薦紳式型鄉邦德惟撝謙材則敏榦纓冠拯
閱流丸釋難葛秤自平禹鼎同鑿物無遁類里有遷善
咸同之厄蜀亂始萌一蟻潰穴百犬吠聲萑苻盜聚草
木兵驚曼衍日滋剽掠轉橫迺結碉堡迺簡魁桀十夫
成椎一隊拔戟暨暨其容整整其列家難旣紓王愾亦
敵成功弗居長揖歸田犧憚被繡驥甯就鞭冥漠何篡
委佗善卷勁姦落落清石粼粼旣覩紛爭彌馱騁驚廩
儲宿春機絳餘素含飴弄稚醜酒速故卒離晷日溘先
朝露仰睇繁條藟無再葇俯聆急湍邁焉迅徂壑舟易
徙弦筈空吁哀貢族鄙軼結朋徒明器旣陳幽局式奠

華表茗茗漆鐙黯黯竦楸翳景宿芙蓉霰修夜何暘逝
川永歎元穹杵倚碧澥塵揚先賢汝南耆舊華陽私史
輟筆壹行掩芳員石式鐫高山有行晞晞之暉搏搏者
地沈輝弗婁遺芳彌厲湛水栽碑生金結字吾生有涯
人間何世

督學吳使君頌

督學侍御歷城吳移香先生苞粹懿之質負昭明之學
比玉九德襟弁於人師食鷄千蹠弼彪其符采李元禮
之賓客望若神仙馬季長之生徒服其博洽遂使環林
雋望橫校方聞心折宗師耳騰茂實眴眴焉若屈乘牝

壯造王良而就銜粵金雌雄睇風胡而躍冶故前此分校禮闈典試河南號得人焉先生父某汝南先賢陳留耆舊潛華戢曜時號彪儒誦太丘之碑言爲世範式高陽之里天聚德星先生兄某鐱向高材領校祕閣孫卿老師三爲祭酒長楊扈獵託乘於後車宣室受釐召問於前席其餘金鼎玉友跗萼銜葍東南之寶於茲未盡先生名族舊望學有本原容馬之門曩聞高大鑿楹之書足于諷習文采葩流筦輅少爲鬻雋高第焱發匡鼎射擢甲科館閣迴翔多歷年所詠當階之紅藥春到中書挹切漢之金莖露凝仙掌忘書二篋安世能知奏御

千篇長卿獨擅乙未之歲來視蜀學釋先師之奠時習
禮容策秀才之文言歸大雅迺使百城諭教齊魯之風
復競四子講德中和之樂更宣必欲雍容揄揚敷陳其
事則嘉惠之意固可約言夫馬工枚速曲隨其短長謝
笑顏嗔不輕於喜怒則至寬也注莊之義翦子元之攘
言策魏之文覈仲宣之代作則至嚴也法言辨賦以麗
則爲歸蕭樓選文惟沈思是尙則至精也揀平原之寶
往往碎金拊韓陵之碑寥寥片石則至恕也昔山濤之
啓事各爲題目謝眺之餘論無惜齒牙先生道揚幽滯
假之羽毛在褚令之皮裏別寓陽秋庇王公之宇下都

忘寒暑則又訓厲獎勸樂此不罷者焉然而榛楷勿翦
香蘭閔馨珉珎并理和璞揜采故尊經書院肄業生等
尤先生所拔爲翹材而勛以國器者焉生等揚雲好學
乏深湛之思張叔愛經謝開敏之性先生括而羽之埏
而埴之王仲寶監試諸生十日還學安昌侯講論經義
一卮行酒煦以颺氣而枯條貢春漉以芳液而鮑魚改
臭郇子有曰善假於物呂覽所云視徒如己先生當之
可無媿矣按臨旣畢將歸於京生等相與議曰太康郡
界束皙長生浚儀縣社陸雲配食廉吏可爲師道未立
猶且鑄吉金鏤貞石識彼遺愛縣其去思矧乃子弟誨

我孰嗣國僑丹青染人甚於虞溥頌聲沈寥曷式來葉
於是裁觚削簡謀所以張先生之德者謹案攷文校士
古無蒞官是以文翁守蜀都而小吏受業辛昂令成都
而學堂歡宴自趙宋蒞置提督學士司元明兩朝因循
舊制皇家文化旒被風翔八區庠序如林上儀告具輶
軒使者方言靡遺輓近數紀督蜀學者南皮張公章章
較著至令太學旣建銘翟子超之碑孔堂同升圖劉道
斌之象詎惟在官言官無忝厥職云爾哉抑亦餘慶所
扇子衿誦芬高耀有燭學僮仰炤者焉今先生闡颺景
業相望後先生等不文當仁匪讓希高朕禮殿之遺尙

見當時文雅擬樊陵惠渠之頌難爲盛德形容頌曰鳳
翥鸞翔百羽畢從蚪鬱螭蟠萬鱗泝風宿建斗杓嶽崇
華嵩祈祈英髻歸于儒宗所宗伊何淵聞瞻學胚靈岱
祇孕精沛瀆蒸蔚國寶誕挺先覺金鐘大鏞震響虛霸
句吳姬系長沙漠蕃東都建閩西河乘軒山分玉阜水
控瑤源明德之裔達人孔繁駢圭疊組承世休則籟有
詒經門爲通德羔雁羣盈鱣魚婁集季舞伯歌挹泳芬
烈入龍得爽五馬曰良繡匪鞶悅箴維膏盲齧畚經訓
馳騁文場發策決科蜚聲耀芒東觀蓬萊南州冠冕却
榮軒紱棲神墳典尙書給札大夫授簡研都紙貴橫經

座滿漢使持節周官采風揚旌熨道負弩臨邛行部何
武問字揚雄劔劔學子維錯維龔建福會昌蜀從其朔
坤鎮蟲阜乾輝井絡吉甫倡頌商瞿受學挾璪抽茗鼎
雲代作沃以龐化其興蒸蒸井閭鄉學薦紳式刑辭無
枝葉言惟雅馴十步草茂一山桂馨道謙彌光德下斯
盛霽容霜溫綴言玉潤老虛若谷葛平似秤主持風教
獎育耆俊函牛之鼎匪以烹鮮希驥之乘曷云能賢甄
拔高業歟張講筵簡奇擢秀公也卷卷廓說之郭棟文
之囿發撝六籍雕搜萬有沈義畢鉤纖疑具剖方車筦
轄如繩結紐衢尊酌酥耆味斯醺猛虛流均靡龔弗聞

朋徒蹈渠湯邇歸文斷斷匪昔彬彬有稱維古選士司
徒兼領今則督學顯厥魁柄上賞進賢茂才異等潤色
鴻業領襲後進公肩厥任敷鬯文明虞庠有煒漢京是
宏棟家榦國玉潤金聲其利百世惟公玉成戴公之賜
栒石其泐食公之德編章其絕巖源涓涓峨峯屹屹穆
如清風頌聲無輟

吳烈女贊

女浙人隨父宦蜀許字閩人王某王水死女殉於室

利之所藪人盡賁諸蹈義若登壯夫次且英英烈女之
死弗渝授綏迨吉醮僇徒虛君子遘閔及溺載胥于誰
屋止相彼黔烏太璞不凋雌鏌甯孤寒井冽泉穠條委

考稽山南望駱江東徂煒筦其燁刑于彼姝

譯印入阿毘達磨論通解自序

入阿毘達磨論攝入大藏無單行本得日本人所著通
解謂於教誡學徒有勝功能譯付手民流通法界爰爲
之序曰自拈華一笑別傳演於西天觀壁無言心宗印
於東土著衣吃飯盡逗禪機運水搬柴都歸智證故往
往勘一重公案參幾句話頭輒自謂傳般若之燈種菩
提之樹可謂祖門大啓佛乘轉湮重以慈恩譯述文險
義幽艱深逾於太玄詰屈符於盤詰凡夫劣慧彌苦受
持互以不立文字之言揜其荒廢經論之失於是素怛

纜棄如糟粕阿毘曇忘若筌罟有波羅密之禪無阿笈
摩之理瞻言末法罪過良多夫唯心唯識皆善逝之言
性宗相宗並大乘之教譬如觀海水無非瀾有類然鎧
明卽是焰與其離瀾覓水罔測海之津涯何如就焰求
明猶得鎧之正照必謂直指本心無關教典豈不釋迦
說法等於孟子好辯阿難結集無異昭明選文智者於
斯諒難忍許然而鷲嶺金言鹿園寶帙累世莫究吾生
有涯自非說通而又宗通依義而不依句將不免以四
有八空之義諦資九流七略之多聞是則執着言文攀
緣名相雖復馬馱難勝之偈禿筆能鈔龍藏靡盡之經

瀉瓶成誦而玩物喪志背覺合塵華屋無門額珠永失
則又何怪其爲祖師之所訶斥也哉惟修行人發大願
力以諸佛語印衆生心八萬四千須彌王納歸芥子之
內三萬二千師子座涌現丈室之中自然而證盧舍那
法身窮薩婆若性海始知法性法相非一非異有如鷲
鳥雙翮舉不孤騫大輅兩輪運無單輓而本論則又躋
唯識之頂者引爲初枕啓相宗之奧者佩其祕鑰者焉

荃察余齋駢體文存終

